



Sesida dals

Communitgà ils

Protocol nr.

23 da favrer 2021

1. da mars 2021

178/2021

Incumbensa Favre Accola

concernent la colliaziun Viafier dal Vnuost – Viafier retica

Resposta da la Regenza

L'augment da l'attractivitat dal traffic public en il chantun Grischun cun chadainas da transport sveltas e senza midadas vesa la Regenza sco incumbensa permanenta. Per ch'il potenzial da viagiaturas e viagiatur da las lingias d'apport principalas da la Svizra e da l'exteriur possia vegnir exaurì cumplainamain, dovri primarmain ina buna avertura cun il traffic public en il chantun Grischun. Ultra da la lingia d'apport principala Turitg – Cuira e da la lingia Son Gagl – Cuira èn d'impurtanza er las colliaziuns cun l'exteriur vischin. Cun il project "Planisaziun da novas colliaziuns da traffic" (NCT) ha la Regenza tegni quint – en furma d'ina preschentaziun generala – da la finamira d'examinar d'ina vart colliaziuns sveltas cun la Bassa e cun l'exteriur vischin, e da colliar da l'autra vart las regiuns entaifer il chantun en moda pli optimala e pli confortabla ina cun l'autra (cf. missiva da la Regenza al Cussegl grond, Planisaziun da novas colliaziuns da traffic, carnet nr. 12/2012-2013).

Tar il punct 1: Las novas colliaziuns da traffic tenor la missiva NCT vegnan persequitadas vinavant resguardond las cundiziuns generalas midadas. En regard a la colliaziun da viafier Scuol-Mals èn las cundiziuns generalas sa midadas en quel senn ch'ina decleraziun d'intenziun è vegnida suttascritta l'atun passà a Graun dal Tirol, dal Tirol dal sid, da la Lombardia e dal Grischun. Quella prevesa ina "gruppa da lavur tecnica" che elavura ensemen directivas e finamiras avisadas areguard las differentas novas colliaziuns proponidas tranter ils pajais participads. Concernent in'eventuala finanziaziun da vart da l'Uniun europeica (UE) na datti anc naginas confermas definitivs. Quai po vegnir deducì da la brev dals 5 da favrer 2021 dal guvernatur Kompatscher al president da la Regenza dr. Cavigelli. La finanziaziun tras l'exteriur vischin dals trajects che sa chattan per la pli gronda part a l'exteriur è ina premissa essenziala per la realisaziun e sto vegnir garantida en il rom dal proxim

pass da cumplettaziun (PC STEP 2040/45). Plinavant stoi vegnir sclerì pli detaglia-damain, sch'ils trassés resp. ils puncts da colliaziun a la rait da la Viafier retica (Sagliains, Zernez u Scuol) e da la staziun intermediara pretendida da nov en la Val Müstair èn realisabels. Quests resultats n'èn anc betg avant maun, ma els èn stringentamain necessaris per il chantun per tractar vinavant il project. Ils schlargiements da l'infrastructura pretendan ultra da quai ina garanzia da las investiziuns tras la Confederaziun (fond per l'infrastructura da viafier, FIV) sco er tras l'exteriur. Il project per ina colliaziun da viafier Scuol-Mals n'è betg cuntegnì en il pass da cumplettaziun STEP 2035. La garanzia da la Confederaziun da gidar a finanziar las novas infra-structuras po pia vegnir dada il pli baud en il rom dal pass da cumplettaziun STEP 2040/45. In studi NCT nov e pli detaglià en chausa n'è betg necessari per inoltrar la dumonda a la Confederaziun.

Tar il punct 2: La Regenza dat ina gronda atenziun a la colliaziun dal traffic public cun l'exteriur vischin en quest territori e vegn a prender las mesiras necessarias per realisar la decleraziun d'intenziun. Perquai ch'ils proxims pass per inoltrar il project a la Confederaziun èn standardisads e fixads per gronda part, n'è in concept (supplementar) per cuntanscher svelt la finamira da la decleraziun d'intenziun – tenor la Regenza – betg necessari per far avanzar il project. L'emprim stoi vegnir sclerì tranter ils pajais participads, tge project da las differentas novas colliaziuns che vegnan en dumonda, che duai vegnir priorisà. Las lavurs gia iniziadas da la "gruppa da lavur tecnica" èn decisivas per il project ed il process da finanziaziun che suonda alura vegn fixà per il chantun Grischun tras la Confederaziun en il rom dal STEP 2040/45. Quest urari na po betg vegnir influenzà dal chantun ed è actualmain pir enconuscent en quai che concerna il termin per inoltrar il concept da purschida (december 2022).

Sin basa da questas explicaziuns propona la Regenza al Cussegl grond da refusar l'incumbensa qua avant maun concernent il punct 2 e d'al midar concernent il punct 1 sco suonda:

La Regenza vegn incumbensada – resguardond il resultat da la gruppa da lavur tecnica – d'inoltrar in concept da purschida concernent la colliaziun Scuol-Mals il december 2022 per mauns da la Confederaziun sco basa per il STEP 2040/45.



En num da la Regenza

Il president:

Dr. Mario Cavigelli

Il chancelier:

Daniel Spadin